

Basef Amama Jon Nali'
Nanda'ami
Basef bandami Jon nali'
nanda'ami

- 1:1-4 Jon na'i basef Godi nafela ukup asasimi ma sondanifel
 1:5-2:29 God anan nafifili. Ea' ape' mofe' nafifili ma monda' waf bu'unai ukup mimila epes hiesi
 3:1-24 Ape' mape awasi Godi. Ea' dei' ape' ukup maimaila sahin owan ape'isi, ea' epes awasi Satani sanda' waf aonai la'ela'ef.
 4:1-6 Ape' mowaloga ambagof hiami mogawa ambal Godi o ambal aonai Satani.
 4:7-5:21 God nasapa' Nogalomana Ananinai nafi'li etap anae' nihi'ambapa waf ukup maimailasanai. Ea' mombale'efana ma mope la'ifipa molomana mofa' ambal namunai.

Basef ambal namunai napaimi

¹ Afa' wanda' basef amama ma anona aman agilinama Basef* anan nase'apa ambal namunai napaipai. Aman anama fowa' gani damba damba nape. Afa' wame' basef ananimi watolona naep

* **1:1:** Anona aman agilinama Basef, ma'i Jisas Krais atona.

mahapilana lagof afa'imi. ² Ambal anama† namunai nataga ea' afa' watolona naep afa'imi. Amama atom dei' afa' wawalipipa ma ambal anama nape la'ela'efi. Ambal anama fowa' nape naloma Ahalomapa dei' nataga alihina watolona. ³ Amamaga amama afa' watolom wame'ami dei' wa'ipipam ipe' wapoti' ma pepe ukup etifim pelomafa. Afa' wape wambota atona waloma Ahalomafa naloma Nogalomana ananinai Jisas Kraiss. ⁴ Afa' wanda' basef amama ma anona nemaf danifel ape'inai notaga lu'una ma ape'.

God anan nafifili nanda' waf bu'unai atona

⁵ Basef amama afa' wame'ama anan na'ama. God anan nafifili afitinai. Ina anona owamb nailana, owa'. ⁶ I'i ape' mi'i mope ukup etifim molomana, ama ape' ata' mape manda' waf aonai si'i mape owamb atona, ape' mambaso'ma ape' atepa ma basef ape'imi maloma fe' ape'inai. ⁷ Anan nafifili afitinai. I'i mope mififil si'i anan waf aonai a'apa, ea' mope ukup etifim moloma sahin owan hiesi. Jisas Nogalomana Godi. Ea' esimbel ananiami masa'opa waf aonai ape' manda'anai hianai hi'alana mataga bo'opa. ⁸ I'i ape' mi'i waf aonai a'apa, ape' mambaso'ma ape' atepa ea' basef endilisimi ina mapaipa, owa'. ⁹ I'i ape' mowalapa waf aonai ape' manda'anai alihina, atuwasi Anan nokwahomapa waf hianai aonai ape' manda'anai nosa'opapa motaga bo'opa andeande'. Basef fowa' na'i endilisimi atom nonda' waf bu'unai andeande'. ¹⁰ I'i ape'

† 1:2: Basefa ambal anama ofagema basef biefim. Anom ma'i agel wa'ana Kraiss, si'i basef mape lain 1. Ea' anom ma'i ambal si'i ambal epesi.

mi'i, "Ape' owa' monda' waf aonai", ape' mofala God ma'i anan aman na'i basef baso'maimi. Ea' basef ananini ina mape opalef ape'imi, owa'.

2

Krais aman nagiambamapai

¹ Ipe' alupipei ae'ipei, ae' okom nainailipa, anda' basef amama mafe'mago ipe' ma ina penda' waf aonai, owa'. I'i enin epen nenda' waf aonai, enin anan niegiambamani nape. Anan Jisas Krais bo'ona andeande'. Anan nahali' Ahalomana ma nokwahoman waf aonai epen anama nanda'anai. ² Anan atona nahagofa okom wandafunai Godi naga' nakwaha waf aonai ape' manda'anai. Ea' ina nakwaha waf aonai ape' manda'anai atona, owa'. Anan nakwaha waf aonai ma epes hiesi etapasi hi'alas. ³ I'i ape' mila basef Godi la'ifipa, ape' mogawa anan endilisi. ⁴ Emi egafis sa'i, "Ape' mogawa God andeande'", ama esis owa' sila basef Godi, esis sambaso'ami. Ea' basef endilisimi ina mape opalef asasimi, owa'. ⁵ Ea' emi egafis sila basef Ananini, esis ukup si'im maila God endilisi. Ea' ape' mogawa ape' mape la'ifipa maloma Jisas. ⁶ Emi egafis sa'i, "Ape' mape la'ifipa maloma God", pe asasinai notaga bo'ona si'i pe Jisas Krais.

Emi egafis ukup maimaila sahin owan asasisi, la'ela'ef sape nafili

⁷ Alupipei ae'ipei, ae' okom nainailipa. Dei' ae' anda' basef amama mafe'mago ipe', ina anona mi'uli dambainai, owa'. Ae' a'ipipa mi'uli anama atona fowa'inai, fowa' damba damba pegawana.

Mi'uli anama basef ipe' pame' ea'. ⁸ Basef la'ifimi ma mi'uli anama dei' anda'am mafe'mago ipe', amama dambaimi. Ea' mataga alihima Kraisi nailam dei' ipe' wapoti' pailam. Dei' main, owamb dei' na'i nofe' ea' nafifili endilisinai nataga nape.

⁹ Emi egafis si'i, "Ape' mape nafifili," ama esis opalef aoma sahin owan asasisi, epes isima ata' sape owamb la'ela'ef. ¹⁰ Emi egafis ukup maimaila esis sahin owani, esis sape nafifili. Ea' epes isima ina ata' anona waf aonai napais nanda'as sowa, owa'. ¹¹ Ea' emi egafis opalef aoma sahin owan asasisi si'i naumbih, epes isima ata' sape owamb ea' safe' owamb atona sasopama naep asasisi. Ea' ina sati eaf sailana, owa'. ¹² Ipe' awasi ae'ipei, God nakwaha waf aonai ipe' panda'anai hi'alana ma agel Kraisi. Amama atom dei' anda' basef amama mafe'mago ipe'. ¹³ Ipe' ahape, ipe' pegawa aman anama andeande' fowa' damba damba nape la'ela'efi. Ea' dei' anda' basef amama mafe'mago ipe'. Ipe' awomipei, ipe' pali'amona wandaf aman aonai pikila'ana. Amama atom dei' anda' basef amama mafe'mago ipe'. ¹⁴ Ipe' awasi, ipe' pegawa Ahalomapa andeande'. Ea' dei' anda' basef amama mafe'mepago. Ipe' ahape pegawa aman anama fowa' damba damba nape nafi'i nafi'i la'ela'ef nape. Amama atom dei' anda' basef amama mafe'mepago. Ea' ipe' awomipei, ipe' la'ifipei ma penda' waf bu'unai. Ea' basef Godi dei' mape nomon opalef ipe'imi. Ipe' pali'amona wandafa aman aonai pikila'ana.

Ape' ina ukup mimila waf etapanai, hapainai

¹⁵ Ipe' ina ukup mimila waf etapanai o anom amamaga awami mape etapi, owa'. I'i ipe' ukup mimila waf aonai etapanai, ipe' ina ukup maimaila Ahalomapa, owa'. ¹⁶ Ape' mogawa epes saloma amamaga hiami mape etapi amama na'ama. Amamaga amama opalef apimi mohafemami maloma epes saloma amamaga amama epes satolom opalef kowalasami maloma amamaga amama enis satilis safela agof lu'umami, amamaga amama ina mafi'i Ahalomapa, owa'. Amama mataga etap anae'. ¹⁷ Waf etapanai naloma amamaga hiami epes ukup mohafemami anona nemaf hegililam, ea' emi egafis saila basefa okom Godi, epes isima sape la'ela'ef hihif.

Naumbih Kraisi mataga ea'

¹⁸ Ipe' alupipei ae'ipei, ae' okom maimailipa, dei' nemaf na'i hi'ilana. Fowa' ipe' pame' basefa naumbih Kraisi ma'i motaga. Ea' dei' naumbih Ananimi hiami mataga ea'. Ape' mogawa dei' nogota na'i hi'ilana. ¹⁹ Enis epes sakwaha ape' ea'. Fowa' epes isima ina ape'isi endilisi, owa'. I'i ape'isi endilisi, esis sope solomapa la'ela'ef. Owa'. Esis sakwahepa ea'. Amama atom dei' ape' mogawas andeande', epes isima hiesi ina epes ape'isi, owa'.

²⁰ Ea' ipe' Kraisi nase'epa Ambal Bu'unai Godi ea'. Dei' ipe' hipei pegawa basef endilisimi. ²¹ Ipe' ina pelolama basef amama endilisimi ma dei' enda'mepago basef amama, owa'. Ipe' pegawam. Ea' pegawa basef baso'maimi ina mawalapa basef amama endilisimi, owa'.

Amama atom dei' anda'ago basef amama ma ipe'.
²² Aman nambaso'masi anan emi? Anan aman anama nambaso'mas na'i Jisas ina Kraisi, God nasapa'ana nafi'i, owa'. Aman anama naumbih Kraisi. Anan nowa' alafugama Ahalomapa naloma Nogalomana wapoti'. ²³ Emi egafis sowa' alafugaha Nogalomanai, esis sowa' alafugaha Ahalomana wapoti'. Ea' emi egafis saso' opalefa Nogalomanai, Ahalomapa nape nomona opalef asasimi.

*Ambal Bu'unai Godi nawalipapa basef endil-
 isimi*

²⁴ Basef amama fowa' damba damba ipe' pame'ami, amama hapilam opalef ipe'imi la'ifipa. I'i ipe' pembale'efa basef amama pali' pame'ami opalef ipe'imi la'ifipa, ipe' pepe la'ifipa peloma Jisas Nogalomana Godi noloma Ahalomana mope la'ela'ef molomepa. ²⁵ Kraisi na'ipapa basef endilisimi la'ifimi, Anan anona nemaf nose'apa ambal namunai mope andeande' la'ela'ef. ²⁶ Ae' anda' basef amama mafe'mago ipe' awalapa waf epes isima sa'i seambaso'mipei. ²⁷ Ea' ipe', Kraisi nase'epa Ambal Bu'unai Ananinai. Ea' Ambal Ananinai nape nalomepa opalef ipe'imi nomon. Amama atom dei' ipe' ina gawa a'epa ma enin epen newalipapa, owa'. Ambal Bu'unai Kraisi nawalipapa ma amamaga hiami ina nambaso'mapa, owa'. Dei' ipe' pembale'efa Kraisi pape la'ifipa paloma anan. ²⁸ Ipe' awasi ae'ipei, ae' okom nainailipa a'i pepe la'ifipa peloma Anan ama anona nemaf notaga nondawalap, ape' ina ambagof aom, owa'. Ape'

mitu la'ifipa ma naep Ananimi. ²⁹ Ipe' pegawa Krai Anan bu'unai andeande' endilisi. Ea' pegawa anom basef wapoti', emi egafis saila waf bu'unai andeande', esis awasi Godi.

3

Dei' ape' mape awasi Godi

¹ Eh! Ahalomapa God okom nainailapa endilisi. Ea' Anan nofalapa awasi ananipai. Endilisi, ape' awasi ananipai atepa. Isima sandaiwa'ma Godi sape etap anae', esis ina sogawa God, owa'. Amama atom dei' esis ina sagawa ape' wapoti'. ² Ipe' alupipei, ae' okom nainailipa. Dei' ape' mape awasi Godi. Ea' anona nemaf mope mi'imama, amama ape' ina dei' mogawam, ata' owa'. Ea' ape' mogawa anona nemaf Krai no-taga alihina, nemaf anama motolona notaga nope endilisi si'i Anan nape. ³ Emi egafis sape sohafa Anan nufi'i, esis sape sandondombam opalef asasimi la'ela'ef ma sope bo'wes andeande' si'i Krai nape. ⁴ Emi egafis sanda' waf aonai, esis sosambala mi'uli Godi. Dei' main, sanda' waf aonai atona dei' satopa' mi'uli anama. ⁵ Ipe' pegawa Krai nataga ma nakwaha waf aonai ape' manda'anai hi'alana. Anan ina nanda' anona waf aonai, owa'. ⁶ Ea' emi egafis sape la'ifis saloma Anan, isima ina ata' sape saila waf aonai, owa'. I'i emi egafis saila waf aonai, ukup asisimi ina mati Krai sogawana, owa'.

⁷ Ipe' alupipei ae'ipei, pindumafuma andeande'! Na'ama enin epen nembaso'mepa. Emi egafis sanda' waf bu'unai, esis sape andeande' si'i Krai nape. ⁸ Satan nanda' waf aonai fowa'

damba damba nafi'i nafi'i dei' ata' nape la'ela'ef. Emi egafis sanda' waf aonai la'ela'ef sapomanai, esis epes Satani. Nogalomana Godi nafi'i nataga nandawalapa main? Ma nohambombaga opeh Satan nanda'ami. ⁹ Emi egafis sape awasi Godi, esis ina sape sanda' waf aonai la'ela'ef, owa'. Dei' main, okom Godi nape opalef asasinai ea' esis awasi Godi. Ea' esis ina la'ifisa ata' sonda' waf aonai la'ela'ef, owa'. ¹⁰ I'i ape' mi'i mogawa epen emi egalin, nogalomana Satani o nogalomana Godi, ape' mogowas na'ama. Emi egalin owa' nanda' waf bu'unai ma owa' okom ninila alupusi ananisi, enin ina epen Godi, owa'.

Waf ukup maimaila sahin owan ape'isi atona etin

¹¹ Basef fowa' damba damba ipe' pame'ami amama. Ape' ukup mimila esis sahin owan endilisi. ¹² Ape' ina mila waf Keini, hapainai. Kein wambota aman aonai Satani ea' naha owalomanana Abel naga'. Dei' maina nahana naga'? Anan kowalana ma opeh bu'wami owalomanana nanda'ami dei' nahana naga'. Ea' opeh ananiami aom. ¹³ Ipe' sahin owan ae'ipei, i'i esis sape etapi sowa' alafugaha Godi sindaiwa'mepa, ipe' ina gegelesipa, owa'. ¹⁴ Ape' ukup maimaila esis sahin owan, amama ape' mogawa dei' makwahona waf anama ga'inai mataga mofa' ambal namunai. Dei' main? Ape' ukup maimaila esis sahin owan endilisi. Emi egafis owa' ukup mimila sahin owan asasisi, esis ata' sape la'ela'ef waf ga'inai. ¹⁵ Emi egafis ukup aoma sahin owan asasisi, esis si'i saha enis amam nematawa saga'i. Ea' ipe' pegawa epes saha enis saga'i, esis ina dei'

sefa' ambal namunai sapaina sope andeande' la'ela'ef, owa'etin. ¹⁶ Waf anama ape' ukup mimila enis epes mogawana na'ama. Krais nakwaha ambal ananinai ma nagiambamapa. Amama atom ape' wapoti' mokwaha ambagof ape'imi ma migiambama sahin owan ape'isi. ¹⁷ I'i emi egafis amamaga hiamisi ma siti sahin owan amamaga a'ani ma esis owa' ukup mimila sahin owan, epes isima ina ukup maimaila God, owa'. Dei' maina epes isima sa'i, "Ukup ape'imi maimaila God"? Owa', esis sambaso'am. ¹⁸ Alupipei ae'ipei, ape' ina ukup maimaila esis alupisi ma mi'ipasa basefa malogof atom wafimi, owa'. Ape' ukup mimilas endilisi migiambamas monda' waf bu'unai endilisinai mihi'ambamasana.

Epes sembale'efana endilisi, esis ina umbamahasana naep Godi, owa'. Esis la'ifis sape

¹⁹ I'i ape' monda' waf anama ma ukup mimila sahin owan ape'isi, ape' mogawa maila basef endilisimi. Waf anama nanda' opalef ape'imi awanema mope la'ifipa ma naep Godi. ²⁰ I'i basef mape opalef nomoni ma'iami ma'ipapa basef mihi'ambapa waf ape' manda'anai aona, God dembinai nikila' ukup ape'imi ea' nagawa amamaga hiami.

²¹ Alupipei ae'ipei, ae' okom nainailipa. I'i basef mape opalef nomoni ma'iami ma'ipapa basef mihi'ambapa waf ape' manda'anai ina aona, ape' mefe'ma God opalef ape'imi la'ifim. ²² I'i ape' mi'i monda' beten mohali'ana ma anom amamaga, anan nose'apami. Dei' main, ape' maila okom ananinai manda' amamaga anan

nandanifel ma ape' manda'ami. ²³ Basef la'ifimi Godi ma'i na'ama ma'i ape' mombale'efa agel nogalomanai Jisas Krai ea' ukup mimila sahin owan ape'isi si'i Anan na'ipapa basef la'ifimi. ²⁴ Emi egafis saila basef Godi la'ifis, esis sope la'ifis soloma God ea' God nape la'ifina nolomas. Anan nase'apa Ambal Bu'unai Ananinai dei' mo-gawa God nape la'ifina nalomapa.

4

Basef biefima Ambal Bu'unai Godi naloma ambal aonai nambaso'mami

¹ Alupipei ae'ipei, amam profet mambaso'mami mafel'agon anama etap hiagoma. Ipe' ina pembale'efa epes isima hiesi sa'i, "Ae' Ambal Bu'unai Godi napaiwei." Owa'. Ipe' ata' pegwaloga ambagof amama hiami pendendomam ama pegawa amam mataga mafi'i Ambal Bu'unai Godi o owa'? ² Ipe' pegawa Ambal Bu'unai Godi na'ama. Emi egafis sa'i, "Endilisi, Jisas Krai nafi'i nataga epen endilisinai", epes isima Ambal Bu'unai Godi napais opalef asasimi. ³ Ea' emi egafis owa' si'iam na'ama ma Krai, Ambal Bu'unai Godi ina nape esis, owa'. Ambal nape epes isima anan nanda' naumbih naloma Krai. Fowa' pame' basefa ambal aonai na'i nonda' naumbih noloma Kraisi nifi'i dei' nafi'i nape ea' etap anae'.

⁴ Ipe' alupipei ae'ipei, ipe' epes Godi ea' panda' wandaf paloma amam profet awami mambaso'mami pikila'am. Dei' main, Ambal Bu'unai Godi nape nomon opalef ipe'imi anan

la'ifinai nikila' aman aonai nape etap anae'.
⁵ Epes isima saila waf etapanai sa'i basef etapami atom, epes etapasasi sembale'efam. Dei' main, esis isima etapasasi etis. ⁶ Ea' ape' epes Godi. Emi egafis sogawa God, esis seme' basef ape'imi. Ea' emi egafis owa' epes Godi, isima ina same' basef ape'imi, owa'. Ea' amama atom dei' ikwaf anama nihi'ambapa ma mogawa epes isima. I'i Ambal Bu'unai Godi endilisinai nupais, seme' basef ape'imi. Ea' i'i ambal nambaso'mami nupais, ina seme' ape', owa'.

God okom nainailapa endilisi

⁷ Ipe', ae' okom nainailpei, ape' ukup mimila sahin owan ape'isi. Dei' main, waf anama nafi'i God. Emi egafis ukup maimaila sahin owan, esis awasi Godi ea' dei' segawa God saila basef Ananimi. ⁸ Emi egafis owa' ukup mimila sahin owan, esis ina sogawa God, owa'. Dei' main, God okom nainaila epes hiesi. ⁹ God nihi'ambapa anan okom nainailapa na'ama. Anan nasapa' Nogalomana Ananinai atotona nafi'i etap anae' ma ape' mofa' ambal namunai ma Anan. ¹⁰ Basef ofagema ma God okom nainaila ape' amama. Ape' ina mali' ukup maimailana, owa'. Anan nali' okom nainailapa ea' nasapa' Nogalomana Ananinai nafi'i ma nanda' okom wandafunai Godi naga' nakwaha waf aonai ape' manda'anai. ¹¹ Ipe' alupipei, waf anama atona nihi'ambapa God okom nainailopa endilisi. Ea' ape' wapoti' ukup mimila sahin owan ape'isi endilisi. ¹² Ina enin epen nati God, owa'. I'i ape' atepa ukup mimila sahin owan ape'isi, God nope

la'ifina ma ape' ea' okom ananinai nainaila ape'i atuwasi nope nolomapa opalef ape'imi nomona monda'am na'ama etin ape' ukup mimila sahin owan ape'isi.

¹³ Dei' ape' mogawa ape' mape la'ifipa mal-oma God ea' anan nape nalomapa. Dei' main? Anan nase'apa Ambal Bu'unai Ananinai nape nalomapa. ¹⁴ Ea' ape' mogawa Ahalomapa nas-apa' Nogalomana ananinai ma nofa'ai epes hiesi sape etapi sotanmani ma anan. Ape' mati amamaga amama ma anan nofa'ai epes sotanmai ma'ipasam. ¹⁵ Emi egafis sawalapa basef ali-higuma sa'i, "Endilisi, Jisas anan Nogalomana Godi", God nape la'ifina nalomas, esis wapoti' sape la'ifisa Anan. ¹⁶ Amama atom dei' ape' mogawa mombale'efa God anan okom nainailapa endilisi.

God Anan ofagonama okom nainaila epes hiesi. Emi egafis sape ukup maimaila God naloma epes hiesi la'ela'ef, esis sape la'ifis saloma God ea' Anan nape la'ifina nalomas. ¹⁷ Waf ukup maimaila esis Kristen alupusi endilisi, amama mataga bo'om endilisi ma ape' mitu la'ifipa nemaf anama lu'unai ma God nowalogapa. Dei' main, Anan napaipa nomon, ea' mape etap anae' si'i Kraisi nape. Ape' ina umbamahapa ma nemaf anama God nowalogapa, owa'. ¹⁸ God okom nainailapa, ape' wapoti' ukup maimailana. Ea' ina umbamahapa, owa'. I'i waf anama notaga bo'ona endilisi ma ape', anama natofa waf umbamahapamanai nowala hi'alana. Dei' main, epes umbamahasa amamaga nimanimi anona nemaf God nowalogasa waf aonai nose'asami.

Emi egafis umbamahas, waf ukup maimaila God ina nataga bo'ona endilisi ma esis, ata' owa'.

¹⁹ God nali' okom nainailapa endilisi. Amama atom dei' ape' ukup maimaila anan naloma epes hiesi wapoti'. ²⁰ I'i enis epes si'i, "Ape' ukup maimaila God," ama esis ukup wandafuma Kristen alupusi, epes isima sambaso'mami. Dei' main? Ina enin epen atitin nati God, owa'. Emi egafis sati alupusi asasisi ma owa' ukup mimilas, epes isima ina la'ifisa ukup mila God owa' seatolona naepi, owa'. ²¹ Amama Kraisi na'ipapam la'ifimi amama. Emi egafis ukup maimaila God, epes isima ukup mimila sahin owan asasisi wapoti'.

5

Epes sambale'efanai sahagofa waf aonai etapanai

¹ Emi egafis sembale'efa Jisas anan Kraisi God nasapa'ana nafi'i, epes isima awasi Godi. Ea' emi egafis ukup maimaila ahalomas, esis ukup maimaila awasi ananisi wapoti'. ² I'i ape' ukup mimila God ama mila basef la'ifimi Ananimi, anona nemaf ape' mogawa ukup maimaila awasi Ananisi wapoti'. ³ Waf ofagema ma ape' ukup maimaila God anama. Ape' maila basef mi'uli la'ifinai Ananinai, ina ahifina endilisi, owa'. ⁴ Dei' main, emi egafis sape awasi Godi nanda'as sataga dambais, epes isima la'ifis sahagofa waf etapanai aonai. Ape' mombale'efa God dei' ape' mikila' wandaf mahagofa waf etapanai aonai. ⁵ Emi egafis sikila' wandafa waf aonai nahagofa

waf aonai etapanai? Epes sembale'efa Jisas sa'i anan Nogalomana Godi, esis etis sikila'ana.

God nawalapa basef alihima Nogalomana Ananinai

⁶ Jisas Krai ma'una aman anama nafi'i. Ea' Anan nefa' baptais embel sahana naga' esimb-
bel Ananinai malo. Anan ina nafi'i ma waf
nefa' baptaisa embel atom, owa'. Anan nafi'i
ma waf sahana naga' esimb-
bel ananinai malo. Ambal Bu'unai Godi ofagonama waf endilisinai
hi'alana. Ea' Ambal anama nawalipasa basef
amama ma Krai endilisimi. ⁷⁻⁸ Ambal Bu'unai
Godi naloma embel maloma esimb-
bel, amama wenifim mawalapa basef ofagema amama atom.
⁹ Ape' mombale'efa basef epes sawalipasami. Ea'
basef God nawalipapami la'ifimi mikila' basef
epesi. Dei' main, basef amama ma'i Nogo-
lomana ananinai. ¹⁰ Ea' emi egafis sembale'efa
Nogalomana Godi, basef amama endilisimi mape
nomon okom ananinai. Ea' emi egafis owa'
sombale'efa God, epes isima na'i God aman nam-
baso'mami. Dei' main, isima ina sembale'efa
basef amama God na'ima Nogalomana Ananinai,
owa'. ¹¹ Ea' basef amama endilisimi ma'i na'ama.
God nase'apa ambal namunai ma mape ande-
ande' la'ela'ef. Ambal namunai anama Anan
nase'apana Nogalomana Ananinai atona. ¹² Emi
egafis sape la'ifis saloma Nogalomana, isima dei'
sefa' ambal namunai. Ea' emi egafis owa' sope
la'ifisa Nogalomana Godi, isima ina sofa' ambal
namunai ma sope andeande' la'ela'ef, owa'.

Ape' mogawa mofa' ambal namunai nape la'ela'ef hihifi

¹³ Ae' anda' basef mafe'mago ipe' pembale'efa agel Nogalomana Godi. Anda'ama ipe' pegawai dei' pefa' ambal namunai pape andeande' la'ela'ef hihif. ¹⁴ Ape' mogawa, i'i ape' mila okom Godi atona monda' betena maim amamaga, Anan nome' beten ape'inai. Ea' maina nemaf mefe' felefele'ma Anan monda' beten, ina umbamahapa ma Anan, owa'. Ukup ape'imi mape la'ifim. ¹⁵ Ape' mogawa Anan name' betena maim amamaga dei' mahali'anami. Ea' mogawa dei' mape si'i mofa' amamaga amama ea'.

¹⁶⁻¹⁷ Epes sanda' waf aonai sawala basef Godi la'ifimi. Ea' waf hianai aonai ina nanda' epes saga', owa'. I'i enin epen niti enin sahin owan ananini nenda' anona waf aonai owa' nenda' epen inima nega' higililan, epen inima nanda' waf anama nenda' betena God, nese'an ambal namunai. Endilisi, anona waf atotona aonai nanda' epes saga' hegilalas.* Ae' ina a'ipipa ma penda' betena epes sanda' waf anama, owa'.

¹⁸ Ape' mogawa emi egafis sape awasi Godi, esis ina sape sanda' waf aonai la'ela'ef, owa'. Dei' main, Nogalomana Godi numafias andeande'ma pepel ananinai ma aman aonai ina nahambombagas, owa'. ¹⁹ Ape' mogawa ape' awasi Godi, ea' isima owa' awasi Godi sape owina aman aonai Satan anan dembinai asasinai.

* **5:16-17:** Waf anama na'i waf aonai si'i Judas nanda'anai nandaiwa'ma nembale'efa God. Na'ama dei' anan naga' hegilalana.

²⁰ Ape' mogawa Nogalomana Godi nafi'i ma nose'apa gawa ma mogawa anan God endilisinai. Ape' mape la'ifipa ma Anan endilisinai naloma Nogalomana Ananinai Jisas Krais. God anama endilisinai anan ofagonama ambal namunai napaipa mape andeande' la'ela'ef hihif.

²¹ Awasi ae'ipei, ipe' pepe la'ifipa pewa' alafugaha god baso'mainai hianai. Ea' ma'um.

BASEF BU¹WAMI GODI
The New Testament in the Filifita Language (Ilahita
Dialect), East Sepik Province, PAPUA NEW GUINEA
Nupela Testamen long tokples Filifita long Niugini

copyright © 1998 Wycliffe Bible Translators, Inc.

Language: Filifita (Filifita dialect of Mufian)

Dialect: Filifita or Ilahita

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-18

PDF generated using Haiola and XeLaTeX on 3 Mar 2023 from source files dated 9 Oct 2020

042dd872-74b3-5958-88ef-d4db936348e2